

BOSNA I HERCEGOVINA  
FEDERACIJA BOSNE I HERCEGOVINE  
UNSKO-SANSKI KANTON  
OPĆINA BIHAĆ  
OPĆINSKO VIJEĆE

**IZVJEŠTAJ**  
**OPĆINSKOG VIJEĆA OPĆINE BIHAĆ ZA 2008.GODINU**

Bihać, 06.03.2009. godine

## I U V O D

Općinsko vijeće općine Bihać je, u skladu sa članom 64. Poslovnika («Službeni glasnik općine Bihać 8/05), na sjednici održanoj dana 30. januara 2008.godine usvojilo Program rada općinskog vijeća za 2008.godinu (u daljem tekstu Program rada).

Programom rada bila su obuhvaćena najznačajnija pitanja iz djelokruga rada općinskog organa uprave i drugih pravnih subjekata čiji je osnivač Općina, a o kojima je odlučivalo Vijeće u okviru svojih prava, dužnosti i odgovornosti utvrđenih Zakonom i članom 41. Statuta općine Bihać.

Kako je Vijeće u članu 69. Poslovnika utvrdilo obavezu podnošenja javnosti godišnjeg izvještaja o svome radu to je kroz Izvještaj za 2008.godinu dat prikaz realizacije Programa rada Vijeća u tematskom i normativnom dijelu, na izbor i imenovanja iz nadležnosti Vijeća, davanja saglasnosti na opća akta, razmatranja pitanja iz nadležnosti skupštine BiH, Federacije BiH, Unsko-sanskog kantona te međuopćinske i međunarodne suradnje. Pored navedenog, u Izvještaju je dat kratak osvrt na rad komisija Vijeća, kako stalnih tako i povremenih radnih tijela, a koja su u 2008. godini održale svoje sjednice.

Za sve materijale obrađivači su bile nadležne općinske službe, a predlagач Općinski načelnik, osim materijala kada je posebnim propisom utvrđen ovlašteni predlagач.

Općinsko vijeće realiziralo je svoj Program rada kroz 18 redovnih sjednica, jednu tematsku i jednu svečanu sjednicu koja je održana povodom obilježavanja Dana grada Bihaća. Na redovnim i tematskoj sjednici Vijeće je razmotrilo dostavljene materijale na način i u obimu kako je to navedeno u daljnjem tekstu ovog Izvještaja.

## II TEMATSKI DIO

U tematskom dijelu Vijeće je razmatralo Informacije, Izvještaje, te Programe i Planove.

### Informacije

U izvještajnom periodu Vijeće je razmatralo ukupno 11 (jedanaest) Informacija.

Od navedenog broja bilo je planiranih 7 (sedam) Informacija, a 3 (tri) Informacije Vijeću su dostavljene mimo Programa rada za 2008. godinu i to:

- Ø Informaciju o općinskim autobusnim redovima vožnje u linijskom cestovnom prijevozu putnika prijevoznika „Haro- prijevoz“ d.o.o. Bihać i Bustrans Dulić d.o.o. Bihać,
- Ø Informaciju o radu Komisije za izradu prijedloga dizajna Plakete poginulim braniteljima općine Bihać te
- Ø Informaciju o statusu zemljišta koje koristi Konjički klub „Jedinstvo“ Bihać.

Vijeću nije dostavljena na razmatranje Informacija o korištenju poslovnih prostora u vlasništvu općine Bihać, a Informaciju o stanju bruceloze na području općine Bihać predlagач je povukao u postupku provođenja rasprave.

Pored navedenih Informacija, a radi obimnosti dnevnih redova sjednica , Vijeće je svojim zaključkom utvrdilo obavezu predlagачu da vijećnicima dostavi na znanje slijedeće informacije:

- > Informaciju o socijalnom i materijalnom položaju penzionera-umirovljenika na području općine Bihać uz izvještaj o realizaciji zaključaka Općinskog vijeća po navedenoj Informaciji za prethodnu godinu ,
- > Informaciju o udruženjima finansiranim iz budžeta Općine u protekle četiri godine,
- > Informaciju o kvaliteti vode za piće na području općine Bihać,
- > Informaciju o poduzetim mjerama i radnjama Policijske stanice Bihać,
- > Informaciju o požarima na području općine Bihać,
- > Informaciju o radu zdravstvenih ustanova na području općine Bihać i kvalitet usluga u djelatnosti zdravstva, sa posebnim osvrtom na utrošak doznačenih budžetskih sredstava te
- > Informaciju o početku školske 2008/09 godine, broju upisanih učenika, stanju školskih objekata i pripremljenosti predškolskog i osnovnog obrazovanja na prenos prava upravljanja .

U okviru planiranih Informacija koje su dostavljene Vijeću, njihovo razmatranje rezultiralo je usvajanjem mjera u cilju poboljšavanja stanja u oblasti koju su tretirale.

Obzirom na značaj problematike koju je obrađivala **Informacija o radu zdravstvenih ustanova na području općine Bihać i kvalitet usluga u djelatnosti zdravstva sa posebnim osvrtom na utrošak budžetskih sredstava za unapređenje rada zdravstvenih ustanova**, Vijeće je donijelo zaključak da se razmatra na tematskoj sjednici u januaru 2009.godine.U cilju kvalitetne provedbe rasprave, zadužena je nadležna služba da od zdravstvenih ustanova koje djeluju na području općine zatraži sveobuhvatnu informaciju o konkretnim problemima sa kojima se susreću u radu, broju i stručnoj osposobljenosti kadra i raspoloživoj opremi, sa prijedlogom mjera za prevazilaženje navedenih problema.

Informacija bi imala za cilj da prikaže stanje u primarnoj zdravstvenoj zaštiti organizovanoj kroz djelatnost Doma zdravlja Bihać i sekundarnoj i tercijarnoj zdravstvenoj zaštiti organizovanoj kroz djelatnost Kantonalne bolnice Dr. Irfan Ljubijankić kao i ostalih zdravstvenih ustanova na području općine Bihać putem kojih se ostvaruje zdravstvena zaštita stanovništva. Radi podsjećanja, ističemo, da je najveći broj anketiranih građana kao razloge nezadovoljstva pružanjem usluga u zdravstvu naveo visoke cijene usluga, loše stanje u bolnici, nedostatak opreme, zastarjelu opremu i dr. Da bi se poboljšao kvalitet zdravstvenih usluga građani smatraju da je neophodno provesti reformu na svim nivoima zdravstvene zaštite, da se mora više ulagati u zdravstvenu zaštitu stanovništva, da se ambulante izvan sjedišta grada moraju opremiti i kadrovski ojačati itd.

Na kraju ovog dijela izlaganja, valja napomenuti da su vijećnici periodično bili informisani o stanju javnog reda i mira obzirom da je PS Bihać dostavljala svoje Informacije, te o trošenju sredstava tekuće budžetske rezerve obzirom da ih je predlagач dostavljao Vijeću na razmatranje u zakonom propisanim rokovima.

## Izveštaji

U tematskom dijelu koji se odnosio na izvještaje, od planiranih 29( dvadesetdevet), Vijeću su dostavljena na razmatranje 23( dvadesetri ) izvještaja.

Pored Izvještaja o radu i poslovanju javnih ustanova i javnih preduzeća za poslovnu godinu koje je Vijeće razmatralo u okviru svojih osnivačkih prava, Vijeće je tokom 2008. godine razmotrilo i usvojilo i sljedeće izvještaje:

>Izvještaj o radu općinskog vijeća za 2007. god.

>Izvještaj o radu organa uprave za 2007. god.

>Izvještaj o radu i poslovanju udruženja budžetskih korisnika za 2007.godinu,

>Izvještaj o radu mjesnih zajednica za 2007. godinu.

>Izvještaji o realizaciji planova i programa JU Zavod za prostorno uređenje Bihać za 2007. godinu,

> Izvještaj o realizaciji Programa prevencije narkomanije i drugih bolesti ovisnosti JU Centar za socijalni rad Bihać i

> Izvještaj o stepenu realizacije Programa i provođenja Odluke o legalizaciji bespravno izgrađenih objekata na području općine Bihać.

Obzirom na značaj problematike, posebnu pažnju vijećnika i javnosti izazvao je **Izvještaj o realizaciji Programa prevencije narkomanije i drugih bolesti ovisnosti JU Centar za socijalni rad.**Izvještaj je podnesen Vijeću na razmatranje kao rezultat realizacije dva programa prevencije narkomanije i drugih bolesti ovisnosti koji su realizirani tokom 2007.godine i to:

- Edukativnog programa prevencije bolesti ovisnosti kod školske djece i omladine na području općine u toku školske 2006/7 godine sa zdravstvenog, socijalnog i psihološkog aspekta i

- Programa prevencije „ Moj život- moj izbor.“

Oba programa su organizirana od strane JU Centar za socijalni rad uz finansijsku i drugu pomoć općine Bihać. Provedbom ova dva programa koji su bili kratkotrajnog karaktera došlo se do zaključaka da ovakvom praksom treba i dalje nastaviti i to sa pojačanim intenzitetom rada sa djecom, uz razvijanje kvalitetnije suradnje sa školama i JU Socijalno pedagoškom životnom zajednicom. Općina, u okviru svojih osnivačkih prava i obaveza, mora ustrajati na stvaranju preduslova JU Centar za socijalni rad da formira Porodično savjetovanište sa ciljem da se organizuje stalna aktivnost savjetovanja roditelja kao redovna djelatnost JU. Pored navedenog, Vijeće je zaključilo da je rad na suzbijanju ovisnosti složena i stalna obaveza različitih institucija, viših nivoa vlasti, kao i cjelokupne društvene zajednice, što zahtijeva usavršavanje i edukaciju kadrova, praćenje i primjenjivanje novih metoda rada, uz stalnu evaluaciju postignutog.

U ovom dijelu ćemo istaći i **Izvještaj o stepenu realizacije Programa i Odluke o legalizaciji bespravno izgrađenih građevina na području općine Bihać za 2007.godinu** obzirom da bespravna gradnja prijeti da postane nerješiv problem u budućem prostornom i društveno-ekonomskom razvoju općine. U cilju zaustavljanja bespravne gradnje i ostvarivanja politike prostornog uređenja te osiguranja instrumenata za realizaciju utvrđene politike korištenja prostora, Vijeće je zauzelo stav da je neophodno, ne samo utvrditi obavezu planskog donošenja dokumenata prostornog uređenja, nego i utvrditi principe i mjere za dosljedno poštivanje dokumenata prostornog uređenja. Zaključak Vijeća je bio da to mora biti prioritet ne samo resorne službe i građevinske inspekcije, već i svih pravnih subjekata preko kojih se vrši realizacija prostornih dokumenata. Razlog za donošenje ovakvog zaključka je u činjenici da je odziv za legalizaciju bespravno izgrađenih građevina na području općine u 2007.godini bio veoma slab. Vijeće je ostalo kod ranije utvrđenog krajnjeg

roka (18.02.2008.godine) do kojeg su građani mogli podnositi zahtjeve za legalizaciju bespravno izgrađenih građevina.

U planiranom roku Vijeću je dostavljen na razmatranje Izvještaj o izvršenju budžeta općine za 2007.godinu (godišnji obračun), a tokom godine Vijeće je kvartalno izvještavano o izvršenju budžeta za 2008.godinu.

Od planiranih izvještaja, po zaključku Vijeća, vijećnicima su dostavljeni na znanje slijedeći izvještaji:

- Ø Izvještaj o realizaciji Programa kućne njege JU Centar za socijalni rad u 2007.godini,
- Ø Izvještaj o realizaciji mjera, aktivnosti i zaključaka Općinskog vijeća po informaciji o problemima i potrebama mladih,
- Ø Izvještaj o realizaciji mjera, aktivnosti i zaključaka po informaciji o nasilju u porodici te
- Ø Izvještaj o poduzetim mjerama i radnjama vezanim za radove na obnovi starih gradova Sokolac i Ostrovica.

Vijeće je mimo Programa rada za 2007.godinu razmatralo i:

- Ø Izvještaj o realizaciji godišnjeg operativnog Plana za vode i okolišnu sanitaciju općine Bihać za 2008.godinu,
- Ø Izvještaj o realizaciji Programa „Socijalna karta općine Bihać“te
- Ø Izvještaj o stepenu realizacije Programa i Odluke o legalizaciji bespravno izgrađenih građevina na području općine Bihać za I kvartal 2008.godine.

Od planiranih , Vijeću nije dostavljen na razmatranje Izvještaj o provedbi važeće prostorno- planske dokumentacije za 2008.godinu, a bio je planiran za mjesec decembar tekuće godine.

### **Programi i Planovi**

U Programu rada Vijeća za 2008. godinu planirano je 21( dvadeset i jedan) Program, 8 (osam) Planova i jedna Strategija.

Od planiranih 21 Programa Vijeće je usvojilo 12.

Vijeću nisu dostavljeni na razmatranje slijedeći Programi:

- > Program rada i Finansijski plan za 2008.godinu mjesnih zajednica općine Bihać,
- > Program nadziđivanja zgrada i izgradnje potkrovnih stanova,
- > Program tekućeg i investicionog održavanja JKP Komrad i JP Vodovod,
- > Program uklanjanja bespravno izgrađenih objekata u obalnom zaštitnom pojasu Une i Klokota,
- > Programi Zavoda za prostorno uređenje koji se odnose na gradske ulice, lokalne i nekategorisane ceste, uređenje gradskog građevinskog zemljišta i zajedničku komunalnu potrošnju , za 2009.godinu.
- > Program rada Općinskog vijeća za 2009.godinu,

Nacrt Programa rada Općinskog vijeća za 2009.godinu dostavljen je Kolegiju Vijeća u decembru mjesecu 2008.godine, međutim zbog obimnosti dostavljenih materijala od predlagača, razmatranje istog prolongirano je za januar 2009.godine.

Od usvojenih planova, zbog značaja problematike koju su tretirali, izdvojit ćemo :

- > Plan lokacija za korištenje javnih površina,
- > Master plan odvodnje i prečišćavanja otpadnih voda na području općine Bihać,
- > Strateški plan razvoja općine Bihać,

- > Studija izvodivosti odvodnje i prečišćavanja otpadnih voda na području općine Bihać, te
- > Strategija partnerstva sa građanima

Od navedenih materijala poseban interes izazvao je **Plan lokacija za korištenje javnih površina na području općine Bihać** kojim je, na sveobuhvatan način, regulisano postavljanje privremenih objekata na javnim površinama. Važno je istaknuti da Plan lokacija, kroz svoj tekstualni dio reguliše urbanističko-tehničke uvjete za svaki pojedini objekat, odnosno lokaciju, dok je kroz grafički dio Plana dat prikaz postojećih privremenih objekata kao i planirane lokacije za postavljanje privremenih objekata, čijim donošenjem će se planski i kontrolirano provoditi korištenje javnih površina kako unutar najužeg gradskog jezgra, tako i u širem području grada.

Master plan odvodnje i prečišćavanja otpadnih voda na području općine Bihać, Strateški plan razvoja općine Bihać, Studija izvodivosti odvodnje i prečišćavanja otpadnih voda na području općine Bihać, te Strategija partnerstva sa građanima, razmatrat će se u okviru poglavlja u kojem je obrađena tematska sjednica Općinskog vijeća.

### III **NORMATIVNI DIO**

#### Odluke

U normativnom dijelu, koji se odnosio na planirane odluke, od 58 (pedeset i osam) planiranih prema programu rada Općinskog vijeća, Vijeću je dostavljeno na razmatranje 20 (dvadeset) Odluka. Nerealizirani materijali odnose se, uglavnom, na odluke koje regulišu problematiku prostorno-planskog uređenja Općine, komunalne djelatnosti i slično.

Navešćemo neke od odluka koje Vijeću nisu dostavljene na razmatranje:

- Ø Odluke o usvajanju i provođenju Regulacionih planova: „Barani“, „Kamenica“, „Ceravci I“, „Ripač“,
- Ø Odluke o usvajanju i provođenju Prostornog plana općine Bihać,
- Ø Odluke o usvajanju i provođenju Urbanističkog plana grada Bihaća,
- Ø Odluka o vršenju pogrebne djelatnosti, izgradnji, upravljanju i održavanju grobalja-mezarja na području općine Bihać (Obrađivač, Služba prostornog uređenja i komunalnih djelatnosti),
- Ø Odluka o komunalnom redu (Obrađivač, Služba prostornog uređenja i komunalnih djelatnosti),
- Ø Odluka o građevinskom zemljištu (Obrađivač, Služba prostornog uređenja i komunalnih djelatnosti).

Međutim, cijeneći hitnost i prioritete, kao i razloge njihovog donošenja opravdanim, Vijeće je u okviru svoje nadležnosti, u toku izvještajnog perioda razmatralo 50 (pedeset) odluka dostavljenih od predlagača mimo Programa rada.

Navešćemo samo neke od njih:

- Ø Odluka o općinskoj stipendiji,
- Ø Nacrt Odluke o dodjeli, prodaji i davanju u zakup stanova na kojima je općina Bihać davalac stana na korištenje,
- Ø Odluka o privremenom korištenju javnih površina na području općine Bihać,
- Ø Odluka o pretpostavkama, načelima i načinu izrade Programa kapitalnih investicija općine Bihać.

Pored navedenih odluka Vijeće je u okviru svoje nadležnosti tokom 2008.godine donijelo i značajan broj odluka o raspisivanju javnih konkursa za dodjelu gradskog građevinskog zemljišta, o dodjeli gradskog građevinskog zemljišta po provedenim javnim konkursima, o razrješenjima i imenovanjima, te o promjeni statusa nepokretnosti u općoj upotrebi.

Valja istaći da je Vijeće sredinom 2008. godine usvojilo **Statut općine Bihać**. Razlozi za donošenje novog Statuta općine proizašli su iz obaveze da općine u FBiH usklade svoje statute sa odredbama Zakona o principima lokalne samouprave u FBiH kao i sa drugim zakonima koji su u međuvremenu doneseni ( Zakon o jednakopravnosti spolova, Zakon o sukobu interesa u institucijama vlasti BiH, Izborni zakon itd.).Međutim, najznačajnije promjene odnosile su se na obavezu usaglašavanja sa Zakonom o principima lokalne samouprave, obzirom da su istim na sveobuhvatan način regulisana važna pitanja za jedinice lokalne samouprave kao što su način i izvori finansiranja općine, prijenos nadležnosti sa viših nivoa vlasti, odnos načelnika i općinskog vijeća, procedura usvajanja budžeta općine, status i organizacija mjesne samouprave, učešće građana u odlučivanju i dr.

Pored ostalog, Vijeće je krajem juna 2008. godine usvojilo i **Etički kodeks izabranih zvaničnika općine Bihać** čije donošenje se bazira, između ostalog, na odredbama Memoranduma o razumijevanju potpisanog između Općine Bihać i Odjela za demokratizaciju Misije OSCE-a u Bosni i Hercegovini čiji je cilj implementacija projekta „Ugovor“, a kojim se promoviše lokalna demokracija i jača veza između građana i Općine.Etičkim kodeksom utvrđeni su principi i pravila ponašanja izabranih zvaničnika u obavljanju njihovih dužnosti, obaveze, oblast nadzora, odnos prema općinskoj upravi, medijima i javnosti, te praćenje Kodeksa, a odnosi se na sve izabrane lokalne zvaničnike (općinski vijećnici i Općinski načelnik).

Donošenje **Odluke o privremenom korištenju javnih površina na području općine Bihać**, temelji se na odredbama Zakona o principima lokalne samouprave, kojim je propisano da Općina kao jedinica lokalne samouprave, u okviru svojih nadležnosti utvrđuje i provodi politiku uređenja prostora, te utvrđuje i vodi politiku raspolaganja, korištenja i upravljanja građevinskim zemljištem.U cilju planskog korištenja javnih površina, predmetnom Odlukom utvrđene su javne površine koje se mogu privremeno koristiti, pojam privremenih objekata za čije se postavljanje koristi javna površina, zone, kao i visina, način plaćanja i korištenje naknade za privremeno korištenje javnih površina na području općine Bihać.

Cijenimo da je opravdano napomenuti da je Vijeće u izvještajnom periodu donijelo i novu **Odluku o dodjeli općinskih priznanja i nagrade općine Bihać za 2007. godinu**.

Predlagač je tokom izvještajnog perioda u zakonom utvrđenim rokovima dostavio, a Vijeće je usvojilo : Odluku o izmjenama i dopunama Budžeta općine za 2008.godinu, kao i Odluku o izvršenju Budžeta za 2007.godinu, usvojen je Budžet općine za 2009.godinu, kao i Odluka o izvršenju Budžeta općine za 2009.godinu.

Na kraju ovog dijela izlaganja može se zaključiti da je Vijeće u 2008.godini po raznim pravnim osnovama donijelo ukupno 70 odluka, uključujući i one koje su bile planirane, kao i one koje je predlagač dostavio mimo Programa rada za 2008.godinu.

## **Rješenja**

Pored navedenih Odluka, Vijeće je u 2008.godini donijelo, kao nadležni organ, veliki broj rješenja: o utvrđivanju općeg interesa za izgradnju infrastrukturnih objekata, o utvrđivanju prava vlasništva na gradskom građevinskom zemljištu, o dodjeli neizgrađenog gradskog građevinskog zemljišta u državnom vlasništvu, o preuzimanju zemljišta radi privođenja trajnoj namjeni te imenovanju komisija kao stalnih i povremenih radnih tijela Vijeća i dr. Po navedenim osnovama Vijeće je donijelo preko 52 rješenja.

## **IV IZBOR I IMENOVANJA**

Općinsko vijeće je u skladu sa svojim pravima i dužnostima utvrđenim članovima 109. i 112. Poslovnika, donijelo rješenja o izboru, imenovanju i razrješenju predsjednika i članova skupština javnih preduzeća čiji osnivač je općina Bihać, te članova stalnih i povremenih radnih tijela Vijeća. Takođe, Vijeće je u okviru svojih nadležnosti, imenovalo članove Etičkog odbora Općinskog vijeća općine Bihać. Vijeće je u 2008. godini, donijelo i Odluku o imenovanju predsjednika i članova općinske izborne komisije.

U izvještajnom periodu po navedenom osnovu Vijeće je donijelo preko 20 odluka i rješenja.

## **V DAVANJE SAGLASNOSTI NA OPĆA AKTA**

U skladu sa članom 165. Poslovnika, Javna preduzeća i Javne ustanove dostavila su Vijeću kao osnivaču svoja opća akta u cilju pribavljanja saglasnosti.

Pored navedenih saglasnosti, Vijeće je u 2008.godini donijelo i Zaključke o:

- Ø produženju zakupnog odnosa za 28 stanova u naselju Ozimice II Blok 11 u Bihaću;
- Ø o utvrđivanju vrijednosti boda za utvrđivanje visine komunalne naknade u 2008.godini;
- Ø o davanju saglasnosti za dodjelu u zakup poslovnih prostorija općine Bihać ;
- Ø o davanju saglasnosti na Programe rada i Finansijske planove javnih ustanova i javnih preduzeća čiji je osnivač općinsko vijeće;
- Ø o davanju saglasnosti na Odluku o izmjenama i dopunama Pravila JU“Kulturni centar“ Bihać;

Po navedenim i drugim pravnim osnovama, Vijeće je u izvještajnom periodu donijelo ukupno 63 zaključka.

## **VI TEMATSKA SJEDNICA**

U skladu sa članom 71. Poslovnika općinskog vijeća, Vijeće je 21.05.2008.godine održalo tematsku sjednicu na kojoj su vijećnici razmatrali:

- Nacrt Strateškog plana razvoja općine Bihać za period 2008-2013 godina,
- Nacrt Strategije partnerstvo sa građanima,

- Prijedlog master plana i Studije izvodivosti odvodnje i prečišćavanja otpadnih voda na području općine Bihać.

Izrada **Strateškog plana razvoja općine Bihać za period 2008-2013 godina**, rezultat je potrebe uspostavljanja strateškog upravljanja razvojem i nužnosti definiranja razvojne politike kod utvrđivanja strateških ciljeva razvoja i prioritetnih projekata ka realizaciji tih ciljeva. Glavni cilj ukupnog razvoja je poboljšanje kvalitete života građana svih kategorija, koji će u sebi sadržavati, između ostalog, dobar posao i dobru zaradu, garantovanu kvalitetnu zdravstvenu njegu i socijalnu zaštitu, riješeno stambeno pitanje, visok nivo javne sigurnosti, političku stabilnost, mogućnost obrazovanja, kulture, sporta, te očuvanje životne sredine.

Da bi se ostvarili svi zacrtani strateški ciljevi, propisana je obaveza donošenja godišnjih akcionih, odnosno operativnih planova kako bi se stvorile institucionalne pretpostavke za kreiranje strateškog upravljanja razvojem.

Takođe, Strategijom razvoja općine Bihać stvaraju se prilagodljive privredne strukture, razvoj tržišta rada, maksimalno korištenje prirodnih resursa, razvijeno javno-privatno partnerstvo, te uravnotežen razvoj svih područja općine Bihać.

Cilj i značaj donošenja **Strategije partnerstva sa građanima** ogleda se prvenstveno u jačanju i razvoju demokracije na svim nivoima uprave, a ostvaruje se kroz aktivno učešće građana kako u donošenju odluka, tako i u postojanju suodgovornosti za donesene odluke.

Sudjelovanjem građana u kreiranju odluka stvaraju se pretpostavke za uspostavljanje javno-građanskog partnerstva u razvoju zajednice koje se ostvaruje kroz učinkovitu saradnju između sva „tri sektora“ društva (civilno društvo, privatni i javni sektor).

Nakon iscrpne rasprave, Vijeće je jednoglasno usvojilo i **Prijedlog master plana i Studiju izvodivosti odvodnje i prečišćavanja otpadnih voda na području općine Bihać** čijim će se donošenjem sagledati mogućnosti izgradnje i rekonstrukcije sistema odvodnje i prečišćavanja otpadnih voda na području Općine, a od vitalnog je interesa za održivi privredni i urbani razvoj općine Bihać, zaštite zdravlja građana, zaštite voda i zemljišta i sl.

Obzirom da će usvajanje predloženog Plana i Studije imati za posljedicu i znatno povećanje cijena usluga vode i kanalizacije za domaćinstva, Vijeće je jednoglasno usvojilo i Zaključak kojim se traži od nadležne općinske službe, da u roku od 30 dana, dostavi Vijeću na razmatranje odluku o subvencioniranju socijalno ugroženog stanovništva na području općine Bihać, za navedene usluge.

## VII STALNA RADNA TIJELA OPĆINSKOG VIJEĆA

Shodno članu 37. i 48. Poslovnika općinskog vijeća, Vijeće je obrazovalo svoja stalna radna tijela (općinske Komisije) radi olakšanja i unapređenja efikasnosti rada Vijeća. Komisije su, svaka u okviru svoga djelokruga rada, razmatrale pitanja koja su od interesa za Vijeće, te sve nacрте i prijedloge odluka i drugih akata iz nadležnosti Vijeća.

U pripremi sjednica, Komisije su dale značajan doprinos svojim mišljenjima, prijedlozima i zaključcima da sjednice budu kvalitetnije i efikasnije. U ovom poglavlju dat ćemo osvrt na rad Komisija koje su u 2008.godini održale sjednice.

### a) Komisija za praćenje provođenja Ustava, Zakona, Statuta općine i propisa.

Komisija za praćenje provođenja Ustava, Zakona, Statuta Općine i propisa u 2008.godini održala je 19 sjednica. Obzirom da je jedan od zadataka ove Komisije razmatranje prednacрта, nacрта i prijedloga odluka i drugih akata u pogledu njihove

usklađenosti sa Ustavom, Zakonom, Statutom općine i drugim propisima, kao i njihova pravna obrada, Komisija je po najvećem broju materijala dala pozitivno mišljenje, uz navođenje eventualnih primjedbi, koje su kroz stavove Komisije dostavljane Općinskom vijeću.

Najveći broj primjedaba odnosio se na pravnu obradu pojedinih odredbi ili potrebu za njihovom izmjenom ili dopunom, te ne pridržavanja obrađivača akata čl. 143. i 148. Poslovnika općinskog vijeća.

Valja napomenuti da je Komisija na održanih 19 sjednica razmotrila i dala mišljenje na 215 tačaka dnevnog reda, a da je prisutnost sjednicima bila gotovo 100%.

#### **b) Komisija za društveni nadzor**

Komisija za društveni nadzor u izvještajnom periodu održala je 19 sjednica. Na sjednicama su razmatrani, kako materijali predloženi u sazivima sjednica Općinskog vijeća, tako i oni koji su od strane raznih pravnih subjekata i građana upućivani ovoj Komisiji ili Vijeću.

Obzirom da je u djelokrugu rada Komisije razmatranje pitanja sprovođenja politike izvršavanja zakona, drugih propisa i općih akata koji se odnose na raspolaganje državnom imovinom, način ostvarivanja prava i dužnosti organa uprave, javnih preduzeća, javnih ustanova i drugih organizacija čiji je osnivač Općina, ili se finansiraju iz budžeta Općine, te praćenje ostvarivanja prihoda i rashoda, kao i načina korištenja budžetskih sredstava od strane navedenih korisnika, ova Komisija je izvršila uvid i dala mišljenje na gotovo sve materijale koji su u 2008. godini razmatrani na sjednicama Općinskog vijeća.

Na 19 sjednica, Komisija za društveni nadzor je razmotrila i uputila Vijeću prijedloge, mišljenja ili zaključke na 215 materijala.

#### **c) Komisija za izbor i imenovanje**

U djelokrugu rada Komisije za izbor i imenovanje je predlaganje i imenovanje, odnosno razrješenje funkcionera koje bira ili imenuje Vijeće kada je to utvrđeno Zakonom, Statutom općine ili općim aktima JP i JU, zatim organa upravljanja te članova stalnih i povremenih radnih tijela Vijeća.

U okviru navedenog djelokruga poslova, ova Komisija je u 2008. godini održala 9 sjednica sa kojih je prema Vijeću uputila 20 prijedloga za razrješenje ili imenovanje.

#### **d) Komisija za koordinaciju i unapređenje rada mjesnih zajednica**

Komisija za koordinaciju i unapređenje rada mjesnih zajednica je u skladu sa svojim djelokrugom rada pratila stanje u mjesnim zajednicama na području općine Bihać i razmatrala pitanja od značaja za daljnji razvoj mjesnih zajednica te predlagala mjere za unapređenje njihovog rada ili rješavanja postavljenih zahtjeva.

U kontekstu navedenog, ova Komisija je kroz radne sjednice razmatrala podneske mjesnih zajednica upućene Općinskom vijeću, programe rada MZ za 2008. godinu i izvještaje o radu mjesnih zajednica ( kvartalne za 2008. g. i godišnje za 2007. g.), prihvatila je set odluka koje su se odnosile na visinu i dinamiku isplate sredstava iz budžeta Općine za 2008. godinu namijenjenih finansiranju mjesnih zajednica. Komisija je na 8 radnih sjednica dala mišljenje, stavove ili donijela zaključke na 21 materijal.

Posebno ističemo da je Komisija, zajedno sa predstavnicima resorne Službe, a u skladu sa svojim Planom i Programom rada za 2008. godinu, nastavila sa praksom obilaska mjesnih zajednica kako bi u neposrednom kontaktu sa članovima Skupštine i Savjeta mogla dobiti što objektivniju sliku stanja u mjesnim zajednicama. Takva praksa se pokazala opravdanom i rezultirala je konstruktivnim prijedlozima od strane Komisije nadležnim

službama da poduzmu konkretne mjere na rješavanju infrastrukturnih i drugih potreba mjesnih zajednica , a u cilj stvaranja boljih uslova življenja na prostoru mjesnih zajednica. Najviše zahtjeva odnosilo se na rješavanje problema niskonaponske mreže, vodosnabdijevanja prigradskih MZ, asfaltiranja puteva, odvodnje otpadnih voda i dr.

Tokom radnih posjeta članovi Komisije su predstavnicima MZ ukazivali na njihova prava ali i obaveze koje imaju prema Općini i građanima koji su ih izabrali i na taj način im ukazali povjerenje da zastupaju njihove interese.

Na kraju treba istaći da su mjesne zajednice zahvaljujući upornom insistiranju ove Komisije, redovito u 2008. godini dostavljale svoje finansijske planove i kvartalne izvještaje o radu.

#### e) Komisija za žalbe, predstavke i pritužbe

U izvještajnom periodu Komisija za žalbe, predstavke i pritužbe održala je 11 sjednica, na kojima je razmotreno 37 žalbi.

U radu Komisije, posebno značajnu ulogu imala je Služba za stručne poslove općinskog vijeća, obzirom da je preko stručnog savjetnika za poslove Vijeća, za potrebe Komisije izvršio sazivanje sjednica Komisije, kopiranje žalbi i spisa prvostepenih predmeta i njihovo dostavljanje članovima Komisije , vođenje sjednica i zapisnika Komisije, upoznavanje članova sa pravnom osnovanošću izjavljenih žalbi i zakonima koji regulišu oblast koja je predmet žalbe te izradu rješenja, popratnih akata i njihovu dostavu prvostepenim organima.

#### Tabelarni prikaz

Ukupno zaprimljenih predmeta	Neriješeni predmeti na dan 31.12.2007.g	Zaprimljeni u 2008. g.	Urađeno	Neriješeno
42	1	41	37	5

#### Vrsta odluka

Urađeni predmeti	Žalba odbijena	Poništeno i vraćeno na ponovan post.	Poništeno i odlučeno	Ostalo (povučeno)
42	22	9	4	2

#### f) Komisija za odlikovanja i općinska priznanja

U izvještajnom periodu ova Komisija je održala 5 sjednica na kojima je razmatrana 51 prijava, inicijativa i prijedlog za dodjelu općinskih priznanja za 2008.godinu. Služba za stručne poslove Općinskog vijeća je u okviru svog djelokruga rada za ovu Komisiju obavila sve stručne i administrativne poslove i uradila Odluku o dodjeli općinskih priznanja i nagrade Općine Bihać za 2008. godinu.

#### **g) Komisija za odnose sa vjerskim zajednicama**

Komisija za odnose sa vjerskim zajednicama održala je 2 sjednice u 2008. godini na kojoj je razmatran zahtjev za zaštitu kulturnog naslijeđa mezarja „Harmani“- ekshumacija neprimjereno ukopane osobe. Služba za stručne poslove Općinskog vijeća je u okviru svog djelokruga rada za ovu Komisiju obavila sve stručne i administrativne poslove.

#### **h) Verifikaciona komisija**

U 2008. godini Verifikaciona komisija održala je jednu sjednicu na kojoj je u skladu sa svojim djelokrugom rada izvršila verifikaciju Odluke o prestanku mandata vijećniku Vojčić Mirsadu, te verificirala mandat novom vijećniku Ali Hošiću.

#### **i) Komisija za mlade**

U 2008. godini Komisija za mlade održala je 2 sjednice na kojima je razmatrala zahtjeve za dodjelu poslovnog prostora NVO Volonterski centar iz Bihaća i za organizaciju završne večeri maturanata srednjih škola sa područja općine Bihać, sa prijedlogom da se ista organizira na području Kulturnog centra, odnosno tzv. Vojnog igrališta.

Napomenut ćemo da su se članovi Komisije redovno odazivali „Okruglim stolovima“ u organizaciji udruženja mladih ili su na drugi način doprinicali njihovom radu. Shodno navedenom, uspostavljeni su kontakti sa: Lokalnim volonterskim servisom „Kultivator“, Unijom studenata Univerziteta u Bihaću, Demokratskim centrom „Nove nade“.

#### **j) Komisija za jednakopravnost spolova**

Komisija za jednakopravnost spolova u 2008. g. održala je 4 sjednice na kojima je:

- usvojila Izvještaj o radu Komisije za 2007. godinu,
- donijela Program rada za 2008. godinu,
- učestvovala na „Okruglim stolovima“ na poziv Nevladinih organizacija na temu Zelena linija, te nastavila sa radom u cilju praćenja i poduzimanja mjera na dosljednom provođenju odredaba Zakona o ravnopravnosti spolova na području općine Bihać, a u cilju eliminacije svih oblika diskriminacije žena.

Programom rada definisano je i učešće na okruglom stolu „Glas žene“, obaveza ažuriranja podataka o zastupljenosti spolova u JU i JP, organima državne uprave, pravosuđnim organima i sl.

#### **k) Komisija za međuopćinsku i međunarodnu suradnju**

Komisija za međuopćinsku i međunarodnu suradnju je u 2008. godini održala 2 sjednice na kojima je razmatrala, između ostalog, prijedlog Sporazuma o prekograničnoj saradnji između grada Bihaća i općine Donji Lapac, a posredstvom dviju partnerskih NVO „Žene sa Une“ Bihać i „Ženska grupa Donji Lapac“.

### **VIII POVREMENA RADNA TIJELA**

Vijeće je u 2008. godini u skladu sa članom 62. Poslovnika općinskog vijeća obrazovalo i određeni broj povremenih radnih tijela radi razmatranja pitanja iz nadležnosti Vijeća, a koja nisu kontinuirano predmet vijećničke rasprave ili odlučivanja.

Pomenut ćemo samo neka od njih:

- Ø Komisija za davanje stručne ocjene u postupku izdavanja urbanističkih saglasnosti,
- Ø Komisija za provođenje javnog konkursa za dodjelu neizgrađenog gradskog građevinskog zemljišta.

Vijeće je u 2008.godini imenovalo Komisiju za sigurnost saobraćaja općine Bihać sa zadatkom da analizira primjedbe na primjenu Odluke o regulaciji saobraćaja na putevima u naseljenim mjestima na području općine Bihać, te da u skladu sa ocjenom opravdanosti iznesenih primjedbi predloži nadležnoj Službi poduzimanje odgovarajućih mjera u cilju poboljšanja sigurnosti saobraćaja na području općine Bihać.

Komisija je u toku izvještajnog perioda održala 5 sjednica, usvojila Izvještaj o radu za 2007.godinu, donijela Program rada za 2008. godinu, te razmatrala 9 materijala iz svog djelokruga rada.

Vijeće je, takođe u 2008.godini nastavilo pratiti rad Savjeta za izradu Strateškog plana razvoja općine Bihać, te Komisije za izradu Strateškog plana za vode i okolišnu sanitaciju općine Bihać.

## **IX ZAKLJUČNA RAZMATRANJA**

Nakon izvršene analize realizacije Programa rada Vijeća za 2008.godinu, može se zaključiti da je Program 58,4% izvršen u odnosu na planirano i evidentan je blagi pad stepena izvršenja u odnosu na prethodnu godinu. Naime, razmatranje materijala dostavljenih od predlagača čije je usvajanje bilo planirano u oktobru i novembru mjesecu 2008.godine, prolongirano je iz razloga što je nakon provedenih lokalnih izbora i ovjere mandata izabranim vijećnicima, krajem novembra mjeseca konstituisano Općinsko vijeće, te obrazovana radna tijela Vijeća, nakon čega je održana i prva radna sjednica Općinskog vijeća na kojoj su razmatrani navedeni materijali. S druge strane, Programom rada Općinskog vijeća za 2008.godinu u normativnom dijelu, bilo je ukupno planirano 57 odluka od čega se najveći broj odnosio na odluke o usvajanju i provođenju prostorno planskih dokumenata. Svaka od tih odluka po Programu bila je posebno numerisana (odluka o usvajanju, odluka o provođenju), a što je stvaralo privid velikog broja prostorno planskih dokumenata koji se dostavljaju Vijeću na razmatranje, iako se u suštini obe odluke donose za jedan prostorno planski dokument.

Od ukupno planiranih 125 materijala, Vijeću je do kraja 2008.godine dostavljeno na razmatranje 73 materijala u prijedlogu ili nacrtu.

Općinski načelnik u svojstvu predlagača uputio je Vijeću na razmatranje 125 materijala mimo planiranog u Programu rada za 2008.god. Predmetni materijali odnosili su se na: informacije, izvještaje, programe, zaključke o davanju saglasnosti za dodjelu u zakup poslovnih prostora, saglasnosti na opća akta JU i JP, odluke, rješenja o dodjeli gradskog građevinskog zemljišta, o utvrđivanju općeg interesa, o utvrđivanju prava vlasništva, o otuđenju nedovršenog građevinskog objekta, kao i druge akte rasplaganja iz nadležnosti Vijeća.

U tabelarnom pregledu dat je prikaz ukupnog broja održanih sjednica Općinskog vijeća, planiranih materijala, te broja realiziranih materijala po Programu i mimo Programa Vijeća.

Ukupan broj održanih sjednica OV-a	Ukupan broj planiranih materijala po Programu rada OV-a	Realizirano po Programu rada OV-a	Nerealizirano	Realizirano mimo Programa (neplanirani materijali)
20	125	73	52	125

Pripremu i rad sjednica Vijeća u kontinuitetu je pratio i rad stalnih radnih tijela, od kojih su najznačajnije, po djelokrugu rada, Komisija za praćenje provođenja Ustava, Zakona, Statuta općine i propisa i Komisija za društveni nadzor.

U tabelarnom dijelu dat je prikaz ukupnog broja održanih sjednica stalnih radnih tijela, razmatranih materijala i donesenih zaključaka i mišljenja po navedenim materijalima.

Ukupan broj sjednica stalnih radnih tijela (Komisija OV-a)	Ukupan broj razmatranih materijala	Ukupan broj donesenih zaključaka, mišljenja
82	340	340

Ovo dokazuje opravdanim donošenjem okvirnog Programa rada, jer se na taj način ostavlja mogućnost predlagачu da promptno reagira na promjene zakonske regulative u cilju usaglašavanja normativnih akata, ili donošenja pojedinačnih akata kada je zakonom propisano da je Vijeće nadležni organ za njihovo donošenje.

Takođe, okvirnim Programom rada ostavlja se mogućnost i Općinskom vijeću da samoinicijativno ili po prijedlogu viših nivoa vlasti, zauzme stavove po određenim pitanjima ili da mišljenje na akte viših nivoa vlasti kada se to od Vijeća traži.

Međutim, bez obzira što se Program rada Vijeća donosi okvirno, Službe bi trebale iskazivati više odgovornosti za izvršavanje planiranih zadataka, cijeliti značaj njihovog donošenja i poštivati dinamiku izvršenja Programa Vijeća jednako kao i Programa rada organa uprave.

Uzimajući u obzir naprijed navedeno u ovom Izvještaju, te činjenicu da je dinamika izvršavanja Programa rada bila neujednačena, da je predlagач, vrlo često, neke materijale dostavljao pred samu sjednicu ili ih predlagao kao dopunu dnevnog reda na samoj sjednici, može se konstatirati da je Vijeće uspješno okončalo svoj rad u 2008. godini.

To dokazuje brojka od ukupno 20 održanih sjednica (18 redovnih, jedna tematska i jedna svečana) na kojima je razmatrana 215. tačaka dnevnog reda, o kojima je Vijeće provelo raspravu i donijelo konačne odluke. Takođe, 11 materijala dostavljeno je vijećnicima na znanje, od čega 7 informacija i 4 izvještaja.

I pored činjenice što su rasprave po nekim tačkama rezultirale čestim prekidima sjednice radi zauzimanja stavova Klubova vijećnika, te članova kolegija, povlačenjem prijedloga akata od strane predlagачa u toku rasprave, vraćanjem akata predlagачu na dopunu, mora se naglasiti da su gotovo svi predloženi akti usvojeni.

Ovome je doprinijela kvalitetna priprema sjednica Komisija i Vijeća od strane zaposlenika Službe za stručne poslove općinskog vijeća. Pored obaveza iz Programa rada

Vijeća, Služba je sačinila 28 zaključaka koje je Vijeće donijelo na sjednici u toku rasprava po materijalima, koji su se , u najvećem broju, odnosili na prijedloge mjera po izvještajima o radu JU i JP. Urađeno je 20 zapisnika sa sjednica Vijeća, 85 zapisnika sa sjednica Komisija, stavovi i mišljenja Komisija po svim tačkama iz saziva sjednica Vijeća, 40 zapisnika sa Kolegija te 180 raznih dopisa po zaključcima Vijeća ili komisija. Pored navedenog , Služba je pripremila ili aktivno učestvovala u izradi nacrtu i prijedloga Statuta općine, Etičkog kodeksa izabranih zvaničnika općine Bihać, Nacrta Poslovnika Općinskog vijeća općine Bihać, Odluke o dodjeli općinskih priznanja i nagrade općine Bihać, Odluke o zakupu poslovnih prostorija, kao i drugih odluka koje su normativnog sadržaja.

Spomenut ćemo da su i prijedlozi akata predlagača bili znatno kvalitetniji u odnosu na prethodnu godinu te da je aktivno učešće u raspravi većine vijećnika doprinijelo da usvojeni akti budu kvalitetniji.

Takođe, vijećnici su kroz 179 vijećničkih pitanja, te zahtjevima da se razmatraju određena pitanja iz djelokruga rada Vijeća, ukazivali na probleme vezane za oblast komunalne infrastrukture, komunalne higijene, socijalnog zbrinjavanja lica sa posebnim potrebama, obrazovanja, zdravstvene zaštite građana, te ostalih pitanja čije rješavanje je od interesa za građane i naselja u kojima žive tj. za širu društvenu zajednicu. Iznoseći navedena pitanja, vijećnici su inzistirali da njihovo rješavanje mora biti efikasnije i kvalitetnije u cilju osiguravanja lokalnih potreba stanovništva što je osnovna obaveza općine kao jedinice lokalne samouprave. I kroz vijećnička pitanja vijećnici su, u velikoj mjeri, iskazivali osjećaj odgovornosti i ostvarivanja puno bolje komunikacije sa građanima.

Na kraju ovog dijela treba istaći da je Kolegij općinskog vijeća dao značajan doprinos u pripremama i održavanju sjednica Vijeća kroz 40 održanih sjednica na kojima su se pripremali i utvrđivali planovi rada Vijeća, prijedlozi dnevnog reda Vijeća, te vrlo često pokušavali usaglasiti stavovi klubova političkih partija koje participiraju u Općinskom vijeću po pitanjima koja su političke prirode. Takođe, u toku same sjednice Vijeća, Kolegij je održavao svoje sjednice na kojima su se usaglašavali stavovi po razmatranim tačkama dnevnog reda, što je doprinosilo konačnom usaglašavanju stavova vijećnika i usvajanju ponuđenih materijala.

## **Javnost rada Vijeća**

Obzirom na zakonsku obavezu Općine da je dužna osigurati, razvijati i jačati javnost rada kao predušlov efektivnog političkog nadzora i garancije da će njeni organi provoditi svoje dužnosti u interesu lokalne zajednice, javnost rada je bila osigurana, kako u fazama planiranja i pripremanja odluka, tako i u svim fazama njihove realizacije. Ističemo da je sve važnije odluke, pogotovo one koje su regulirale prostorno-plansku oblast ili su se odnosile na utvrđivanje taksa ili drugih fiskalnih obaveza iz nadležnoszi općine, Vijeće usvajalo nakon provedenih javnih rasprava. Na taj način data je mogućnost građanima, kao i ciljnim grupama da aktivno učestvuju u njihovom kreiranju.

Vijeće je nastavilo u svome radu dosljedno slijediti načelo javnosti i na način da su sjednice Vijeća i u 2008.godini prenošene putem Radio Bihaća. Na taj način građanima grada Bihaća omogućen je blagovremen, potpun i objektivan pristup informacijama koje se tiču rada Vijeća, a naročito odlukama koje je Vijeće donosilo.

Vijeće je u 2008. godini osiguralo da se sve usvojene odluke, zaključci, rješenja i druga akta, a čije je objavljivanje propisano Poslovníkom, objave u 16 „Službenih glasnika općine Bihać“, koji su bili dostupni javnosti na uvid i putem Web stranice Općinskog vijeća.

Takođe, Vijeće je osiguralo svim sredstvima javnog informisanja, pod jednakim uvjetima, prisustvovanje sjednicama Vijeća, kao i informacijama kojima raspolaže, a naročito pristup materijalima koji su se razmatrali na sjednicama.

Vijeće je, u ostvarivanju svojih Ustavom, Zakonom i Statutom utvrđenih prava, obaveza i odgovornosti, nastojalo razviti dobre odnose suradnje i međusobnog uvažavanja sa svim političkim strankama, udruženjima i nevladinim organizacijama na području općine Bihać. Ova suradnja naročito se ogledala kroz prisustvovanje predstavnika Vijeća mnogobrojnim «Okruglim stolovima» nevladinih organizacija, te razmatranja njihovih inicijativa, prijedloga ili zahtjeva o kojima je Vijeće stavove i mišljenja zauzimalo, putem svojih Komisija ili Kolegija Vijeća.

### **Međunarodna suradnja**

Razvijajući i njegujući visok nivo uspostavljenih odnosa sa prijateljskim i bratimljenim gradovima, Općinsko vijeće je zajedno sa Općinskim načelnikom, nastavilo kontakte sa predstavnicima gradova Novo Mesto- Republika Slovenija, Hamm- SR Njemačka, Bondeno- Republika Italija.

Njihove predstavnike smo pozvali na Dan grada Bihaća - 26. Februar, kao i na manifestacije «Bihaćko ljeto» i «Una-regata». Sa bratimljenim gradom Novo Mesto smo ojačali suradnju na «kulturnom planu». Takođe, u toku 2008. godine smo nastavili kontakte sa općinama «Ličko-senjske» Županije R Hrvatske radi unapređenja zajedničkih dobrosusjedskih i poslovno turističkih odnosa.

### **Prijedlog mjera u cilju kvalitetnijeg i efikasnijeg rada Vijeća.**

Uzimajući u obzir sve izneseno, a posebno primjedbe i sugestije vijećnika koje su se iznosile na sjednicama Vijeća, a u cilju još kvalitetnijeg i efikasnijeg rada Vijeća, potrebno je više pažnje posvetiti slijedećem:

>Nadležne općinske službe dužne su više pažnje obratiti na planirane programske aktivnosti Općinskog vijeća te u skladu sa istim proslijediti materijale Vijeću na razmatranje u propisanim rokovima ili o razlozima ne dostavljanja obavijestiti Kolegij Vijeća.

- Ø Nadležne općinske Službe, kao neposredni izvršioći poslova i zadataka u okviru jedinstvenog općinskog organa uprave, kao i one koje vrše nadzor nad zakonitošću rada Javnih preduzeća i Javnih ustanova čiji je osnivač Općinsko vijeće, dužne su i

dalje pratiti obaveze ovih pravnih subjekata koje imaju prema osnivaču te u tom kontekstu zahtijevati od njih da postupe u skladu sa zakonom i drugim aktima te Programom rada Vijeća, u cilju dostavljanja u roku planiranih materijala na razmatranje i saglasnost.

>Nadležne općinske Službe su dužne, kada uoče probleme u funkcionisanju navedenih pravnih subjekata, zajedno sa njihovim organima upravljanja i rukovođenja predložiti konkretne mjere u cilju njihovog prevazilaženja. Ovdje se misli prvenstveno na Izveštaje o radu i finansijskom poslovanju koji se, vrlo često, dostavljaju bez konkretnih mjera ili prijedloga, ili su iste predložene bez konsultacije sa organima rukovođenja i upravljanja navedenih pravnih subjekata, a posebno kada su u pitanju JU ili JP koja su iskazale gubitke u svom poslovanju.

>Nadležne općinske službe su dužne izvijestiti Vijeće o realizaciji zaključaka donesenih na sjednicama Vijeća, kao i o razlozima radi kojih se isti nisu realizirali, obzirom da službe Vijeću ne dostavljaju povratne informacije o realizaciji donesenih zaključaka, što kod vijećnika ostavlja dojam da se ne realiziraju.

>Nadležne općinske Službe su dužne više pažnje posvetiti vijećničkim pitanjima i prilikom obrade istih dostaviti ih na vrijeme, ponuditi potpunije odgovore, te poduzeti adekvatne mjere na otklanjanju uočenih propusta obzirom na vrlo česte primjedbe vijećnika na ne odgovaranje i kvalitet odgovora na postavljena pitanja.

Od nas, općinskih vijećnika, se očekuje da u svome radu dosljedno provodimo zakonitost, te odredbe Statuta općine i Poslovnika općinskog vijeća. Na taj način ćemo najbolje doprinijeti efikasnijem i kvalitetnijem održavanju sjednica Vijeća, provođenju općinske politike, izvršavanju poslova iz okvira djelokruga rada Općinskog vijeća, te provođenju drugih akata koje je donijelo Vijeće kako bi opravdali povjerenje koje su nam građani dali omogućivši nam svojim glasovima da budemo vijećnici u Općinskom vijeću grada Bihaća.

U tom cilju naša je obaveza da:

-razvijamo svijest građana o pripadnosti zajednici i potičemo ih da preuzmu odgovornost za doprinos koji daju javnom životu na području svoje općine,

- donesemo planirane i poboljšamo donesene općinske propise uz učešće građana u procesu donošenja,

- zajedničkim djelovanjem doprinesemo da se usvojeni akti u kojima su projekti od općeg značaja za lokalnu zajednicu realiziraju, a u cilju stvaranja kvalitetnijeg ambijenta življenja na području Općine,

- više pažnje posvetimo onim kategorijama građana kojima je zbog socijalnog statusa pomoć lokalne zajednice neophodna ili su, de facto, na marginama javnog života u lokalnoj zajednici,

- ističemo činjenicu da su djeca i mladi ljudi potencijal budućeg održivog razvoja lokalne zajednice kao i važnost njihove uloge te u tom cilju stvaramo ambijent za njihov odgoj, obrazovanje i zaposlenje,

- nastojimo da svi izabrani zvaničnici općinskog nivoa vlasti, svim dopuštenim sredstvima, a naročito poštujući i primjenjujući dosljedno odredbe Etičkog kodeksa izabranih zvaničnika općine Bihać, ispoštuju svoje obaveze utvrđene zakonom u okviru samoupravnog djelokruga općine.

Na kraju bi zaključili sa konstatacijom da i Općinsko vijeće i Općinski načelnik moraju imati jedinstven cilj, a to je poboljšanje funkcionisanja organa Općine i statusa općine Bihać, obzirom da su kao izabrani zvaničnici, predstavnici svih građana i svakog pojedinog građanina koji je za njih glasao, bez obzira na političko opredjeljenje, etničku ili nacionalnu pripadnost.

**P r e d s j e d a v a j u ć i**  
**Općinskim vijećem**  
**Ivan Prša s.r.**